

Nama Kolum: Perbendaharaan Rahsia Raja (7)

Nama Pena: Bonda Tun

Tarikh: 25/06/16

Bismillahirrahmanirrahim

Sabda Rasulullah ﷺ:

“Barangsiapa yang meninggal dunia tanpa menyaksikan dalam hidupnya (institusi) bai’ah (sumpah taat setia) yang memberikan legitimasi kepada pemerintahan (umat Islam) adalah seseorang dia meninggal dalam keadaan jahiliyyah.” (HR Muslim)

(yakni memberikan implikasi kematian dalam era kembalinya manusia kepada zaman jahiliyyah)

Dalam konteks hadith di atas, Syeikh Abdul al-Wakil Durabi berkata bahawa pemerintah yang dimaksudkan ialah KHALIFAH atau WAKILNYA. Maka ijmak ulama ahlu sunnah wal jamaah telah merujuk kepada sistem khilafah dan wakil khalifah seperti Institusi Raja-raja Islam, gabenor, ketua kabilah dan sebagainya, sebagai sistem pemerintahan umat Islam yang mempunyai legitimasi agama sebagai penerus Rasulullah ﷺ dalam menjaga kepentingan Islam dan umatnya baik dari sudut ukhrawi mahupun duniawi. Itulah sebabnya alim-ulama silam termasuk imam-imam mujtahid yang agung seperti Imam Abu Hanifah, Imam Malik, Imam Syafiee, Imam Ahmad ibn Hanbal dan sebagainya, telah memberikan sokongan padu pada sistem khilafah dan kesultanan.

Imam Ibnu Hajar berpendapat bahawa *“melantik Raja hukumnya Fardhu Kifayah seperti melantik Kadhi”*, manakala Imam Yusof al-Ardabili as-Syafiee menegaskan bahawa *“umat Islam mestilah mempunyai raja yang mendirikan agama dan membela orang yang kena zalim, dan menyempurnakan segala hak, oleh itu wajib melantik raja apabila raja itu mangkat.”*

Oleh kerana Islam telah menjadikan perkara melantik raja itu satu perkara yang wajib, amat besar dan penting, maka perlantikan seorang raja mustahak didahulukan daripada mengkebumikan raja yang baru mangkat sebagaimana perihalnya kemangkatan seorang khalifah. Ini adalah kerana jikalau tiada dilantik khalifah/raja terlebih dahulu maka banyak perkara wajib akan tergendala.

Mengikut dalil ijma’ as-sahabat r.a anhum, mereka begitu mengutamakan kepentingan melantik seorang khalifah sebagai menggantikan Rasulullah ﷺ sehingga terpaksa menundakan kewajiban mengkebumikan jenazah baginda selama tiga hari dua malam kerana baginda tidak mewasiatkan penggantinya secara khusus. Sedangkan jelas bahawa pengkebumian jenazah perlu dilakukan secepat mungkin dan diharamkan atas orang-orang yang wajib menyiapkan pemakaman jenazah melakukan kesibukan lain sebelum jenazah dikebumikan

Bagaimanapun para sahabat Rasulullah ﷺ, samada yang terlibat secara langsung dalam urusan pengkebumian jenazah baginda mahupun yang tidak, masing-masing turut menunda kewajiban tersebut selama tiga hari dua malam semata-mata untuk mencari pengganti. Ini menunjukkan adanya persepakatan

para sahabat tentang status hukum melantik khalifah yang lebih diutamakan daripada menguburkan jenazah. Begitu juga apabila Khalifah Umar al-Khattab r.a hampir menemui ajalnya, beliau memerintahkan ahlu syura untuk mencari pengganti khalifah dalam batas waktu tiga hari. Hukum ini serupa juga dalam hal perlantikan seorang sultan atau raja.

Dalam hal perlantikan khalifah, sebelum Khalifah Umar al-Khattab wafat, beliau juga telah berwasiat bahwa sekiranya dalam tempoh tersebut tidak tercapai kesepakatan untuk mengangkat seorang khalifah (yakni berlaku perselisihan), maka hendaknya orang yang tidak ikut bersepakat dibunuh.

Hal ini adalah sebagai menurut perintah Rasulullah ﷺ sendiri sebagaimana yang dinukilkan dalam sebuah riwayat dari Abdullah bin Amr bin As bahawa beliau mendengar Rasulullah ﷺ bersabda :

“ Siapa sahaja yang telah membai’at seorang Imam, lalu memberikan huluhan tangan dan buah hatinya (untuk mentaati perintahnya), maka hendaklah ia mentaati imam tersebut selagi masih mampu, dan jika ada orang lain hendak mengambil kekuasaan darinya, maka penggallah leher orang itu”

Abu Said al-Khudri juga mendengar dari Rasulullah ﷺ :

“Apabila dibai’ah dua orang Khalifah, maka bunuhlah yang terakhir dari keduanya”

HR Arfajah yang berkata: Aku mendengar Rasulullah ﷺ bersabda:

“Siapa saja yang datang kepada kamu sekalian sedangkan urusan kalian berada di tangan seseorang (Khalifah), kemudian dia hendak memecah belahkan kesatuan jemaah kalian, maka bunuhlah dia.”

Khalifah Umar menugaskan lima puluh orang dari kalangan ahlu syura dan pemuka-pemuka para sahabat untuk melaksanakan misi tersebut. Semua ini terjadi di hadapan para sahabat dan tidak ada seorang pun yang menyanggah atau menyangkal perintah Khalifah Umar pada masa itu.

Bermakna terdapat ijma’ sahabat bahawa umat Islam tidak boleh kosong dari pembai’atan kepada khalifah selama lebih dari tiga hari dua malam, dan kesatuan ummah amat diperlukan dalam hal memilih khalifah yang mana jikalau terdapat sebarang unsur-unsur pencabulan proses tersebut sehingga mendatangkan kacau-bilau dan pecah-belah, maka syariat Islam menganjurkan sekeras-keras hukuman demi menjaga perpaduan dan kesatuan orang-orang Islam.

Dan hukum inilah yang menjadi sandaran kepada adat pertabalan raja Islam, yakni sebagaimana perlantikan khalifah, perlantikan raja mustahak didahulukan daripada mengkebumikan raja yang baru mangkat supaya jangan sampai perkara-perkara wajib dalam hal urusan pemerintahan umat Islam menjadi tergendala.

Wallahu ‘alam bissawab.